

Fo scritto in campo e dato comissione di perdonar a tutti li rebelli sono in le terre, come al signor capitano zeneral parerà. E questo fu fato aziò facilmente si potesse otenir le terre.

158 *A dì 27, la matina, fo letere di campo dil provedador Contarini zeneral, date a la Volta, ch'è mia cinque di là di Valezo sul mantoan, a dì 25, ore 4 di note.* Come esso provedador stava bene et era cavalcà contra il capitano zeneral et governador, li quali erano tornati de Peschiera e aveva abuto la rocha a pati, et donato ducati 100 al castellan alemano era li per l'Imperador, e alcune biave. Ne la qual roca havevano trovato assa' monizion, et havia posto li sier Alvise Bembo provedador executor; et che aspetavano la risposta di la Signoria nostra, et che si leveriano e anderiano col campo a Gambara, poi a Pontevicho, da matina, dove aspeterano l'hordine nostro; et che erano stati in consulto *quid agendum*, e il governador e tutti li capi dil campo consigliavano il ritornar a l'impresa di Verona, excepto el capitano zeneral che vol andar avanti etc.

Di Vincenzo Guidoto secretario nostro era appresso il vicerè, data a Voghera a dì 24. Come el vicerè avea fato meter el suo pavion in campagna, e diceva voler andar contra francesi per far la zornata; et che l'era zonto 4000 sguizari et aspettava de li altri, et aspettava la zente dil Papa; et che fazevano molto dil bravo etc.

Vene in Colegio el conte di Chariati orator yspano, e disse aver auto letere dil vicerè, che l'havia auto aviso dal Papa come Sua Santità manderia le stie zente, et che Maximian era zonto do zornate sopra di Trento; et come erano calati 5000 sguizari et ne caleria da 25 milia; et ch'el Ducheto li havea donà, a essi sguizari, Como liberamente, et ofertoli el castel di Milan ch'el sia suo, e che loro lo tegni como uno di soi cantoni. *Item*, disse come Zenoa avea voltà, et era stà taià a pezi uno fiol di missier Janus di Campo Fregoso, ch'è doxe, et cazato esso doxe di Zenoa da l'altra parte; la qual nova di Zenoa non fu creta da quelli di Colegio; et s' il sarà vero, questa sera se intenderà il tutto.

Vene l'orator dil Papa e stete longamente con i Cai di X in Colegio, e li fo dito scrivesse di questo in conformità a Roma, et comunicatoli nove dil Turco; el qual promise scriver al Papa in bona forma, e tien non sia vero quanto à dito el Cariat, perche fin qui el Papa monstra esser neutral.

Da poi disnar, fo Pregadi et leto le sopraserite letere.

I Diarii di M. SANUTO. — Tom. XVI.

Fu posto, per li savii, una letera a Roma in conformità etc. Presa.

Fu posto, per li savii, una letera in Franza, aviarli i successi. Presa.

Fu posto, per sier Alvise Pizamano, sier Marco Antonio Bon e sier Polo Morexini Cai di XL, che avendosi a far ozi uno orator in Franza in luogo di sier Piero Lando, à refudado, saria mal far eletion di persona che refudasse e non fusse di autorità, rizercando cussi li presenti tempi; però l'orator da esser electo possi esser tolto di ogni loco e officio e sia fato con pena. Et fu presa.

E tolto il seurtinio con boletini, non passò alcuno. Et poi fu trovato la parte che non si poteva meter per algun di Colegio parte di dar più salario a li oratori che ducati 120, si tutto il Colegio d'acordo non meteva la parte; et però, secondo usanza, fu tolto il secondo seurtinio senza pena, et rimase sier Alvise Mocenigo el cavalier, fo orator in Franza, el qual la matina sequente accettò. 158*

Scurtinio di orator in Franza in luogo di sier Piero Lando à refudado.

† Sier Alvise Mozenigo el cavalier, fo ambassador in Franza, qu. sier Thomà	85. 79
Sier Marin Morexini, fo avogador di comun, qu. sier Polo	75. 84
Sier Piero Pasqualigo, dottor, cavalier, ch'è di la zonta	80. 88
Sier Marcho Antonio Venier, l'auditor vechio, qu. sier Chistofolo	36.136
Sier Hironimo da ca' da Pexaro, fo podestà e capitano a Trevixo, qu. sier Beneto procurator	82. 81
Sier Domenego Venier di sier Andrea procurator, fo auditor vechio	39.126
Sier Francesco Donado el cavalier, è di Pregadi, qu. sier Alvise	59.105
Sier Alvise Gradenigo, fo Cao dil Consejo di X, qu. sier Domenego cavalier	51.111
Sier Sebastian Justinian el cavalier, fo savio a tera ferma	52.113
Sier Marco Gradenigo dottor, è provedador sora i officii, qu. sier Anzolo	35.128
Sier Gabriel Moro el cavalier, è di Pregadi, qu. sier Antonio	56.109
Sier Andrea Foscolo, è di la zonta, qu. sier Marco	36.131